


明世法錄


終九十二



			二	漢
		三	三	書
	九	〇	八	門
五	三			
九				
冊	架	函	號	類

庫文開內			
二			漢
九	五	二	
五		三	
函	九	二	書
一	六	八	
六			
架	冊	號	類

內閣文庫		
番號	漢	2228
冊數		59(59)
函號	295	56



皇

明世法錄卷之九十二

淺草文庫

史官



陳仁錫

論次

表忠

死事列傳

夫封疆之臣。則死封疆。業受專城之責。而城亡與
亡固其所也。不又曰謀人之軍。師敗則死之。謀人
之邦邑。危則亡之乎。一時諸臣。奉命防禦。或督兵
轉饟。或募士守陴。竭股肱之力。不濟則以死繼之。
皆分所莫逃者。豈可忍須臾之苟活。受萬代之詬
名。為縣責父所竊笑哉。或以王珪魏徵事為解。夫



皇明世宗 卷九十二
珪徵受命唐祖。為青宮庶僚。其不可與委質任事之臣。同日而論明矣。人臣之義。當以王陵為正。作死事諸臣傳。

姚善

錢芹

王賓

陳彥回

周繼瑜

張彥方

黃清

馬坤

姚善字克一。湖廣安陸人。志行淳實。學識高遠。為諸生時。扁讀書所曰待旦軒。工詩。與會稽唐之淳相唱和。洪武中。繇鄉舉。歷祁門丞。同知廬州重慶。所至有能聲。三十年。擢知蘇州府。初

太祖以吳染夷俗。僭靡違式。繩以重法。器訟者更持

短長。訟蜂起難治。善洞曉政體。周悉人情。弛張寬密。各協時宜。數造請郡賢。考求治道。商畧民生休戚。稍因俗救正。吏民回嚮。治為列郡最。隱士王賓居陋巷。善往候。舍車詣門。賓問為誰。對曰姚善。乃開門延語。及賓報謁。望門再拜而返。善自邀還。辭非公事不敢入。又將候韓奕。奕避入太湖。善歎曰。韓先生所謂名可聞。面不可見也。錢芹自守甚高。善願見不可得。有俞貞木以明經見重於善。月朔望。必延致學宮。講經書訓士。一日饋米於貞木。誤致芹所。芹受之。吏覺其誤。請貞木以告。貞木曰。錢

先生不苟取予。今受米不辭。必仰府公之賢耳。善聞之喜。欲往候。使人先道意。芹對使者曰。芹誠願見公。然芹民也。禮不可往。見於庭。若明公弘下士之風。請俟月朔相會於學宮。善如期迎芹至。置土坐。請質經義。芹曰。此士子之業。公今事有急於此者。善竦然請問。芹出一簡授善。竟不交言而去。視之。則守禦制勝之策也。善益重之。時靖難兵已南。狗。善密結鎮常嘉松四郡守練兵勤王。而薦芹爲行軍司馬。善尋至京師。畫策防禦。又從大將軍北行。旋還京。

建文君用廷議。貶齊黃於外。善言於朝曰。兩人有文武才畧。可以扶顛濟危。反置之散地不用。今事已狼狽。急須召之。乃召還二人。四年。詔善兼督蘇松嘉常鎮五郡兵。勤王未及戰。

文皇卽位。索子澄甚急。子澄避善所。約共航海舉兵。善謝曰。公可去。善不可去。公朝臣。可四往號召。圖興復。善職守土。義當與城存亡。子澄遂去。善爲麾下許千戶縛獻。

上詰善曰。若一郡守。乃敢舉兵抗我耶。善厲聲不遜。死之時年四十三。子節謫戍賀縣千戶所。幼子繼

兒隨母宋給配保兒項兒習匠時壬午七月十日也。後沈魯以詩弔之曰。倉卒勤王五郡兵。南風無力北風鳴。清忠自托西湖月。穢史何曾說杲卿。正德中巡撫秦金祀之鄉賢祠。

錢芹字繼忠。吳人。少好奇節。洪武初辟大都督府掾。從中山王出絕漠。解職家居。二十餘年。姚善虛心求見。芹授一冊。竟不交言而退。冊中言勤王事。不知其詳也。建文中詔舉山林巖穴懷才抱德之士。善薦芹爲戶部司務。畱中議事。尋署行軍斷事。從大將軍諮議軍事。入奏事。道病卒。條上兵事。緩

急。年七十二。賜棺斂。歸葬黃山。

王賓字仲光。號光菴。吳中高士也。未冠父歿。終身不冠。夙善姚廣孝。廣孝掃墓歸吳。謁賓。再閉戶不見。已徒步往。乃見之。語未卒。遽墮茗甌而仆。口目俱歛。或曰廣孝三謁賓不肯見。從門隙窺見。呼之。賓以吳音應曰和尚差哉。有文集若干卷。贊曰克一治理。庶幾君子。芹賓蒸蒸。文質是底。羅致一時。勤王是矢。五郡方糾。中台已圯。從容就戮。不忤民士。

陳彥回字士淵。福建莆田人。父立誠。洪武間歷仕

皇明世宗 卷九十二
州縣後被誣論死。彥回謫戍雲南。弟彥困遼東。彥回未入滇。家人多道死。比至蜀。惟祖母郭僅存。會赦。又弗原。監送者憐而縱之。顧貧不能歸。往依邑人定遠知縣黃積良。因更姓名曰黃禮。積良罷。依南克縣丞于中和。已閩中。教諭嚴德政薦彥回。明經爲保寧府學訓導。三考至京。承顧問。陞平江知縣。閏十三月。

高皇崩。彥回入臨。給事中楊惟康薦其文學廉幹。陞徽州知府。數日政教一新。士民感悅。未幾郭氏卒。當承重。郡民走京乞畱。時彥回尚蒙黃姓。居恒以

亡命冒宗爲愧。屢欲陳首。以祖母年高。慮有蹉跌。隱忍二十餘年。至是衰經赴闕。疏其故。乞正名籍。許之。并除彥困戍籍。仍從徽民請復畱郡。彥回乞堯服不允。而許襄事供職。彥回葬郭于郡之北山。始視事。時走墓下哭甚哀。郡人名爲太守山。靖難師起。彥回奉命募義勇。至京師。適彥困至。自遼東邂逅旅邸。悲喜交集。謂所知曰。予荷朝廷再造之恩。此生不足報萬一。當遣弟歸治家事。予身許國。他不恤也。未幾北軍渡江。彥回糾衆赴援。靖難後擒械至京。不屈而死。年四十七。妻屠配爲奴。

皇明世宗 卷九十二 表忠
五 死事列傳

周繼瑜江西撫州人建文中為松江同知勤王詔下同知榜募義勇入援并言靖難兵乖恩違義文皇即位械至京不屈磔於市

張彥方江西龍泉人建文元年為給事中以便養告改樂平知縣四年勤王詔下彥方糾義起兵一邑響應或沮之彥方大哭曰君父在水火吾可自緩乎遂率所部抵江口遇靖難游兵執至樂平梟其首暴屍譙樓時暑月經旬顏面如玉無一蠅集父老竊葬縣治之清白堂後

黃清未詳何許人相傳建文時巡撫某地靖難後拒不奉詔欲興兵力寡不克被擒論死馬坤不諳何官亦同論死

贊曰勤王之旅寥寥罕覲彥回投袂繼瑜決策樂平纓冠黃亦植髮偉哉丈夫須髯如戟相彼青蠅聞風辟易

顏伯瑋 子有為 胡先 唐子清 黃謙

向朴 楊姓 王尹實 韓彥復 顧道

鄭恕 二女 鄭華 妻蕭 趙次進

顏伯瑋名瓌以字行江西廬陵人唐魯公真卿之後聰敏介直能文章洪武末舉賢良除沛縣知縣

靖難兵起。所過郡縣皆歸附。伯瑋獨以死自誓。時李景隆屯德州。淮北民終歲餽運。伯瑋措畫有方。民不告勞。辛巳六月。北兵掠濟寧。游兵過沛。沛人竄匿。伯瑋設法招徠之。會設豐沛軍民指揮司。集民兵五千人。築堡備禦。尋為山東調去。過半。壬午正月。北兵攻沛。伯瑋遣縣丞胡先間行。至徐告急。援兵不至。度不能支。令其弟珏子有為還。曰。汝歸白大人。子職弗克盡矣。題詩察院壁曰。太守諸公鑒此情。只因國難不能平。丹心不改人臣節。青史誰書縣令名。一木豈能支大廈。三軍空擬築長城。

吾徒雖死終無憾。望采民艱達聖明。二十二日夜二鼓。北兵入東門。指揮王顯迎降。伯瑋冠帶升堂。南向慟哭。拜曰。臣無能報國。遂自經死。時年五十。子有為不忍去。復還。見父死。亦遂自刎。珏走濟寧。逾月還沛。知胡先已收葬。伯瑋父子於沛南關外。乃至徐。告友人晏璧。璧與伯瑋同郡。宦於徐。因為傳其事。言伯瑋孝友。婣睦。鄉黨稱其六行無異詞。以故守令知而薦之。及令沛。數以事至徐。又同督運德州。每連牀共食。談誦慷慨。練達機宜。深喜鄉郡之有人。屬縣之得賢長吏也。寄百里之命。視死



皇明世宗錄 卷九十二 七
如歸。賢於人遠矣。正統中御史彭勗。令有司起墳立祠祀之。

唐子清。沛縣主簿。有善政。民愛之。北師日迫。知縣顏伯瑋專調兵食。一切邏察事。皆付子清。北兵執子清。將兵者欲畱不殺。子清曰。吾願從顏令於地下死之。

黃謙以儒生爲沛典史。果敢能戢下。顏伯瑋禮遇之。益効力盡職。北兵欲執謙。至徐招降。謙感顏知己。願同死死之。

向朴。字遵博。浙慈谿人。宋文簡公敏中十四世孫。父壽。宗慈湖之學。學者稱爲樂齋先生。朴得其傳。行務寔踐。力學養親。洪武二十五年。以人才應詔。陛見。

上問居家何爲。對曰種田。其容秀而文。因詢大麥何以四節。對曰。以其占四時耳。授獻縣令。單車就道。不携妻子。時兵燹之餘。爲闢荆榛。畚瓦礫。教百姓農桑。與同甘苦。流移漸復。靖難師起。獻當兵衝。無城郭。朴集民兵。激以義勇。與北將譚淵迎戰。衆寡不敵。被執。懷印死。年四十三。獻民哀之。拾遺骸葬道左。都御史陳瑛獻人也。怨死事諸臣最深。請究

皇明世宗金 卷九十二
治不已。有楊姓者懼其發冢。夤夜負骨潛葬邑北十里。永樂初中秘王尹實北上。詢得葬所。夜夢朴服血污葛衣。共談往事。起秉燭爲文。乘星月往哭之。洧川令韓彥復匿其二子於任。司諫顧道輯其遺事。書於寶峰菴佛座。三人皆義士也。二子道淳道徵。道淳被徵稱疾不赴。有王偉元攀栢悲號之風。嘉靖間朴祀本縣鄉賢祠。隆慶五年。又祀獻縣名宦祠。萬曆初撫按奉
詔建祠本縣北門外。王尹實韓彥復顧道附祀別室。獻民楊氏殿食焉。

鄭恕字本忠。浙仙居人。好古博雅。家甚貧。釜甑生塵。一毫不妄取。蕭然斗室。日與學徒數十人講論經義。高風勁節。一時傾嚮之。寧波知府聘爲昌國訓導。尋陞知蕭縣。甚得民心。建文四年。靖難兵攻破蕭。恕不屈死之。後籍其家。二女當配。亦死之。子濂。混姪。溫。汲。謫北平種田。或曰恕嘗有平燕疏。歸起義兵。時無應者。遂往就戮。蓋事定加刑也。台州祀恕八忠祠。邑祠祀恕及其二女。

鄭華字思孝。浙臨海人。洪武丁丑進士。初授行人。奉使川廣。有令名。建文中謫東平州吏目。靖難兵

起謂其妻蕭曰。吾義必死。奈親老汝少。何。妻泣對曰。君能為國。妾獨不能為君乎。華乃稱疾尋醫。携家托其友無錫丞趙次進。馳還東平。時州長貳盡棄城走。華獨率吏民死守。北將朱能攻陷東阿。分兵取東平。華曰。守土之臣。義不苟生。力戰而死。年甫三十。台州祀華於八忠祠。

贊曰。獻鄆河上。沛蕭淮南。兵衝地要。螳拒奚堪。朴華前死。環怨後殲。闔城殉義。乃有清謙。一時烈禍。千古奇男。

侯太茅卯 陳植 邊昇 金有聲小進

樊士信 葉福 韓節 王彬

崇剛 陳質 段實

侯太。北直南和人。或曰河南人。累官至刑部尚書。靖難兵起。太與侍郎郭任主抗禦之策。壬午二月。督餉至濟寧。五月復督餉至淮安。經畫苦心。嘗徹旦不寐。京師失守。太行至高郵。與其隸上高縣人茅卯仔同執。下錦衣獄。太不屈死之。妻曾配象奴。弟敬祖子玘皆論死。籍其家。陳植。廬江人。洪武間為吏部主事。歷官兵部侍郎。靖難兵至。植受命督師江上。麾下密議迎降。植以



皇明世宗錄 卷九十二 十一
大義責之。誓死固守。都督金某遂殺植。率眾奉迎。自陳邀賞。

文皇立誅之。命具棺殮。植遣兵護喪。葬于白石山。植宗人懼。皆變姓名走匿。無敢會葬者。

邊昇。河南滎澤人。洪武中以明經薦。累官兵部侍郎。有氣節。靖難師渡江。昇率兵拒之。殊死戰。被獲。不屈而死。

金有聲。河南人。爲刑部侍郎。建文四年。奉命與黃觀。張顯宗。王叔英。徵兵江西。有指揮常州朱進。隨行。六月。爲南昌百戶劉恩縛。送京師死。進亦死。

樊士信。湖廣應城人。洪武十八年進士。建文中以兵部主事。守淮河。北兵南下。士信禦之。力不支。遂死。

葉福。閩縣人。官刑科給事中。北平師起。自誓必死。遣僕歸報其母曰。福爲王臣。誼不得爲孝子矣。及師逼京城。福守金川門。有內叛納降者。遂自殺。載閩三忠祠碑。

韓節。揚州人。爲工部郎中。守金川門。城破。節爲亂軍所殺。

王彬。字文質。兗州人。洪武中進士。爲御史巡淮揚。

皇明世宗金 卷九十三 十一
靖難兵至。彬與指揮崇剛共守揚城。指揮王禮欲
舉城降。彬知之。執禮繫獄。彬外禦內防。七日不解
甲。有力士能舉千斤。彬常以自隨。北兵飛書城中。
有縛王御史降者。官三品。左右憚力士莫敢縛。禮
弟崇厚賂力士。誘其子出。彬方解甲浴。千戶徐
政縛之以獻。彬不屈死之。妻子皆死。正統間。白日
現形。院中親與提學副使劉瑞談其死事。

崇剛揚州衛指揮。沉鷺有膽畧。靖難兵起。剛練兵
繕甲。濬城濠。御史王彬倚任之。兵至。專以城守事
屬。剛晝夜不解甲。有欲迎降者。忌剛然畏彬。不敢

發。及彬爲麾下所縛。開門降。并縛剛。剛不屈死。

陳質。歷官江西都指揮使。有威名。建文初。充叅將
守大同。尋陞中府都督同知。發代府陰事。代簡王
獲罪。靖難兵出懷來。質以西師助宋忠。忠敗。退守
大同。靖難後。被執不屈。

文皇曰。此奸人害代王者。遂誅質。

段實。內官。守徐州。有功。不屈死。

贊曰。乘城捍圍。惟力是視。天欲廢之。金湯曷恃。隸
也同死。弁也倒戈。賣國邀賞。被戮則那。

皇明世法錄 卷九十二 三

死戰列傳

疆場之事一彼一此勝敗亦何常哉去病天幸不
敗李廣數奇無功名將不如福將自古皆然而况
曆數有歸真龍無敵勝則風鶴皆兵敗則智勇俱
困由斯時而論材之短長亦耳食甚矣諸臣之力
屈被擒非罪也擒而降降而用乃非其初耳郎之
戰公叔禹人耻士不能死與其童汪疇死焉孔子
許其勿殤以能執干戈以衛社稷也故死於陣者
上也死于纍囚者次也作死戰諸臣傳

耿炳文 俞通淵

耿炳文濠州人父君用至正壬辰江淮雲擾所在盜賊充斥君用彷徨無所歸謂炳文曰與其伏山林斂手就戮曷若求豪傑而往輔之乃以是歲八月謁

高皇於濠城一見被知遇授君用管軍百戶甲午四月領軍從

上取滁州六月取城口張營寨取嘉山繆把頭寨七月克滁城乙未閏正月從

上取和州授管軍總管三月濠舊帥孫德崖就食於和與郭帥有隙蓄異志

上為德崖軍所留炳文翼衛甚至竟保無他六月從上渡江拔采石乘勝取太平丙申二月從克采石寨

走蠻子海牙三月破陳兆先陸寨十日取金陵守禦聚寶門十七日父子隨徐達取鎮江四月君用

援宜興地與張士誠界各柵木自營君用賈勇騰柵而上剗甚巨力戰不休竟死炳文領其軍六月

取廣德丁酉二月取長興獲戰船三百餘艘擒吳將李福安答失蠻等義兵萬戶蔣義率所部二百

人降有儒士溫祥卿者避亂挈家來歸炳文與語奇之畱贊軍事用其策分兵據要害設戰具為守



皇明世宗錄 卷九十二
御計三月立來興翼元帥府以炳文爲元帥五月
吳將潘原明嚴再興來寇屯上新橋炳文擊敗之
原明等遁去辛丑十月吳將李伯昇率十餘萬衆
水陸進寇城中兵僅七千

上命陳德華高費聚往援之北至吳夜劫營諸軍皆
潰炳文嬰城固守明日遣副帥劉成出西門迎擊
敗之敵軍下瞰城中運土石填壕隍放火船燒水
關攻城益急炳文晝夜相持凡月餘旣而援兵至
伯昇棄營遁追斬五千餘人甲辰九月改元帥府
爲指揮使司以炳文爲指揮使十月張士信以兵


來侵炳文破之獲其元帥宋興祖士信憤怒復益
兵圍城炳文復與費聚出戰敗之自是士誠奪氣
不復敢圖長興矣炳文守長興凡十年孤城血戰
卒以無虞功最大丙午八月

上命伐張士誠先取湖州調炳文往十一月湖州平
進圍蘇州諸將分門而軍炳文軍城東北四面困
以長圍又架木塔築層樓置弓弩火器於上復設
巨砲以擊之城震恐敵兵屢出挑戰屢衄而入
吳元年九月城破士誠就擒論功陞大都督府僉
事冬從征中原克山東沂益諸州郡明年

上即位進功臣秩授鎮國上將軍兼右帥府副使三月克汴梁四月克河南府五月召回扈從車駕北巡七月還京師九月同常遇春克大同十月克懷慶澤潞十一月守大同十二月拔平陽克太原二年二月從大將軍達征陝西時兩軍夾武功東川而陣李思齊在其東張思道壘其西日數挑戰蓐食以俟衣甲不少解如是者數月思齊輦力不支相與遁去達既得其地即以炳文守之嚴號令練軍伍築溼陽縣洪渠堰又濬渠十萬三千餘丈民皆利焉是年冬大賞守禦功三年正月授秦王府

左相六月以左相兼陝西行省右丞尋開行大都督府命署都督僉事十一月封長興侯五年以後皆鎮陝西十三年十二月故元平章乃兒不花等寇邊

上命炳文領軍輔大將軍達討之四月至塞外大破虜於北黃河俘獲人馬數多悉送達所十五年七月詔遣巡視陝西城池督軍屯田十二月炳文討訓練陝西二十二衛校卒凡十萬六千八百七十四人得驍勇騎士一萬九千七百九十人習馬二萬三千五百匹十六年雲南平命往諭潁川侯傅



友德班師。兼視城堡郵傳。籍軍數田糧。十九年從征雲南。二十年討曲靖。普安諸蠻寇平之。二十一年同定遠侯王弼北征。獲故元餘孽。及後宮妃后於捕魚兒海。

上賜緡鑑五萬錠。與造第鳳陽。葺其先塋。復推榮其三世。二十五年。陝兩當縣妖人作亂。率兵聲討。三年克之。三十年。蜀盜爲亂。以征西將軍往討之。擒賊首高佛興。俘其衆三千餘人。以獻。明年。鎮守遼東。建文改元。靖難兵起。命炳文佩大將軍印。自遼東率衆二十萬。援真定。與北將張玉朱能戰。炳文

大敗。奔還滹沱河東。衆尚數萬。十月復戰。衆皆潰。炳文死於陣。年六十。有五炳文老將善戰。及敗。歿。建文始有憂色。代者益非其人。竟至於亡。子璿。獻皆都督僉事。有傳。瑄散騎舍人。擢尚寶卿。皆獲罪死。

俞通淵。廬州巢縣人。父河間郡公廷玉。兄虢國公通海。南安侯通源。初充叅侍舍人。從大將軍征秦隴。燕趙。陞督府僉事。征哈喇哈。至捕魚兒海。獲酋長人畜。等轉餉。江西充偏將。征都勻。龍場諸蠻。克辰沅寶慶。俘獲多。封越巒侯。討建昌叛賊。城越巒。

二十六年坐累奪侯還鄉。建文初召見授豹韜衛指揮充偏將。從大將軍禦靖難兵。號敢戰。白溝河之役。諸將兵大敗。通淵歿於陣。敕葬號國公墓旁。命子靖嗣官。尋卒。幼子端優給錦衣全俸。亦卒。靖難後家人懼禍不敢言襲替。建文末諸將校往往失世官也。

贊曰長興越雋。百戰餘勁。授鉞秉旄。笳鼓不競。豈繫衰竭。成敗天定。罰及於嗣。吁嗟忠殉。

李堅

胡觀

李堅河南武陟人。洪武中以功臣英子選尚大名

公主為駙馬都尉。堅素負才勇。建文初以軍功封樂城侯。靖難師起。充左副將軍。從耿炳文戰於真定。時炳文謹備西北。北兵出不意攻其西南。炳文大敗。堅與北將兵福接戰。互有勝負。已而兵敗。薛祿引槊刺堅墜馬。揮刀斫之。堅大呼我李駙馬勿殺。祿擒以獻。

燕王謂曰爾懿親今至此奈何。堅無降附意。命械送北平道卒。子莊以公主故見宥。當嗣。懼禍繳誥券。流寓南京。詩酒終其身。

胡觀東川侯海之子。尚

太祖第十女某公主為駙馬都尉。建文三年，克副將軍佐李景隆北征。


燕王謂諸將曰：李景隆志大無謀，喜專違眾。郭英老邁退縮，平安復而自用，胡觀驕縱不治。吳傑儒而無斷，數子皆匹夫，無能為也。比景隆敗於白溝，觀為燕兵所殺。或曰：觀於末樂三年，為陳瑛所劾，自縊死。

贊曰：半月影落，高飛燕起。天所興廢，何關臣子。堅觀懿親，乃肯一死。傳之後來，無忝肺腑。

馬宣曾濬 余瑱宋忠子謙 彭聚 孫泰

馬宣不知何許人。建文初為都指揮，守薊州。靖難師起，張玉以薊鎮外接大寧，可控引女直諸虜。且兵多騎士。三河潞河躍馬可度，不先定將為後患。宣果起兵迎拒。

燕王遣玉及朱能將兵攻之，敗於公樂驛。宣旋師與鎮撫曾濬閉城堅守，反覆諭之不下。玉等擁眾急攻，宣出戰被擒，并擒濬，皆不屈。宣罵不絕口死。余瑱北平衛指揮使，建文時歷官都督，初與謝貴密謀不遂，貴死，瑱走保居庸關。時宋忠承制令瑱守之，瑱簡練關卒，得數千人，將進攻北平。



燕王曰。居庸險隘。爲北平咽喉。瑱若據此。則拊我背。宜急取之。緩則增兵繕守。後難圖矣。遂專力擊瑱。瑱且戰且守。援兵不至。棄關走懷來。依忠。忠又敗。北兵給曰。石頭城亦破矣。瑱曰。石頭城便破。吾亦不舍懷來。力盡被執。不屈死。

宋忠。錦衣衛指揮使。智勇有名。洪武二十九年。百戶有論死非其罪者。忠疏救。御史劾之。

太祖曰。忠率直無隱。爲人請命。何罪爲。并宥百戶。戍邊三十年。爲御史劉觀所劾。調鳳陽中衛。明年平。荒將軍齊讓討西夷無功。以忠爲叅將。從征虜前。

將軍楊文討之。凱旋復官。錦衣。建文初。敕忠以都指揮總邊兵三萬屯開平。盡簡燕府護衛壯士從。忠聽忠節制。又以都督徐凱屯臨清。耿嚳屯山海。與忠相犄角。且約張昺謝貴葛誠爲內應。及昺等遇害。靖難兵起。奪居庸關。守將余瑱敗走。忠不敢進退保懷來。

燕王謂諸將曰。宋忠擁重兵懷來。必爭居庸。宜乘其未至。先擊之。諸將皆曰。敵衆我寡。難與爭鋒。宜固守以待其至。

文皇曰。此非爾等所知。遂統精兵八千。卷甲倍道趨。

懷來。先是獲諜言忠激諸將士云。爾等家在北平者。竝為燕府所滅。盍努力復家讐。報國恩。

燕王急令其家人張故旗幟為先鋒。遙呼其父子兄弟相勞問無恙。諸將喜曰。我家固安。宋統兵欺我。遂倒戈走忠。倉卒列陣未成。燕師一麾渡河。鼓譟而進。忠敗死之。子謙鎮南衛指揮。後謫戍邊。尋賜死。

彭聚孫泰俱北平都指揮也。從宋忠守懷來。頗有斬獲。忠敗。泰中流矢流血。被甲裹創。奮呼與聚力戰。陷陣俱亡。當是時。諸將校為靖難兵所俘者百餘人。皆不肯降以死。大半不可考矣。

贊曰。薊丘居庸北平咽喉。多算者勝。千里不留。衰哉。忠瑱智不及謀。不能抗搃。寧免俘囚。聚泰宜濬力戰以休。死綏死鼓。忠魂悠悠。

楊松 潘忠 甯忠 劉燧

徐凱 程進 張傑 余琪 趙許 胡原 李英

楊松為都指揮。耿炳文之駐兵真定也。遣松為先鋒。都督徐凱領軍十萬。駐河間。潘忠屯鄭州。松帥驍勇九千人。進據雄縣。約忠為援。

燕王謂諸將曰。今夕中秋。彼必不備。飲酒為樂。此可



破也。亟行。夜半至雄。圍其城。而忠援兵未至。黎明城破。松與麾下戰死。

燕王度潘忠在鄭州。未知城破。必引衆來援。遂命領兵千餘。渡月漾橋。伏水中。又令軍士數人。伏路側。望見忠等接戰。卽舉砲。旣而忠等果至。王進兵逆擊之。路傍砲舉。水中伏兵亦起。據橋。忠戰敗。急趨橋。不得。北兵腹背夾攻之。遂生擒忠。

甯忠。累官都督。建文元年。充右副將軍。與駙馬都尉李堅佐大將軍耿炳文北征。駐軍真定。潘忠楊松敗。王至鄭州。獲降將張保。保言炳文兵十三萬。

半營滹沱河南。半營北。

燕王計欲炳文并其衆。則易破。乃善撫保。遣歸詐言兵敗被執。幸脫歸。又令言雄縣敗狀。燕兵旦夕且至。炳文聞言。果移南營過河。

燕王兵次無極縣。炳文軍滹沱河北。繇西門而營。直抵西山。次日。燕師未至。真定二十里。擒樵採。知炳文惟備西北。王乃率騎數千。繞出城西。炳文適出送使客。覺兵至。奔回。急趨橋。燕軍斫橋。炳文幾被擒。城中大驚。炳文乃率堅忠出城交戰。

燕王與丘福以奇兵出其背。循城夾攻。橫衝其陣。炳

皇明世宗 卷九十三
文大敗急奔入城軍爭門門塞不得進踰藉死者甚衆忠及都指揮劉燧等皆被執後忠與妻徐同死徐卽凱女也

徐凱合肌人爲松潘守將征賈哈喇有功又副沐春討刁幹孟陞都督僉事鎮守四川階文軍叛會都督甯正討平之建文元年副大將何福征百夷靖難兵起練兵臨清二年十月凱與陶銘城滄州與平安吳傑盛庸相犄角燕師自通州趨滄州凱戰不勝入城東門之卒先潰凱及都督程遷都指揮俞琪趙澣胡原李英張傑將校百餘人皆被執

械送北平道死

贊曰雄莫六守恒滄隨棄長子輿尸弟子縲繫勇怯同盡邦家之瘁敗則可矜死亦其義

朱鑑 卜萬

朱鑑北平行都司都指揮守大寧北兵至大寧諸將陳亨房寬皆降鑑力戰不支被縛罵不絕口死之

文皇檄中所謂萬段凌遲處死者卽鑑也

卜萬未詳所自起建文時爲大寧守將謀勇自負每戰先登靖難兵畏之部將陳亨欲降畏萬不敢

發。燕行反間。貽萬書。盛稱獎萬。極詆毀亨。緘識牢密。召所獲大寧卒。解縛厚賞之。置書衣中。俾歸密與萬。故使同獲。卒見之。怪問守者曰。彼何為得此守者曰。遣歸通密書於卜都司。卒跪告守者曰。能為我請得偕行。惟命是從。不敢望賞。守者為請。遂俱遣而竟不與賞。不得賞者終不平。至即發其事。劉貞陳亨搜卒衣。得與萬書。遂執萬下獄死。未幾亨竟降。貞遁遼東。大寧相繼不失矣。贊曰。古今用間。兵家之奇。亨降萬繫。時事已非。不有鑑也。誰死疆圍。

鄧戩 陳鵬

瞿能 子 滕聚

鄧戩陳鵬為都指揮。與都督吳傑等守真定。

燕王曰。若吳傑等嬰城固守。是為上策。若來求戰。是下策也。當設奇以誘之。乃散軍四出。聲言取糧。又令校尉荷擔抱嬰兒。佯作避兵奔入城云。燕軍各散。取糧營中。無備。戩等信之。乃出師。與燕軍遇於藁城。突入奮擊。矢下如雨。箭集王所建旗。如蝟毛。擒殺甚眾。忽大風起。發屋折樹。燕師乘之。戩軍大潰。與鵬俱被擒。繫北平獄死。

瞿能字世賢。合肥人。驍勇有名。洪武中以四川都

指揮使與同知徐凱統兵從涼國公藍玉擊西番有功。又從都督聶緯討建昌叛酋月魯帖木兒。又副藍玉破賊雙狼塞。以都督僉事掌雲南都司。建文君即位。從李景隆為裨將。攻北平。能力戰勢甚銳。與其子率精騎千餘。殺入彰義門。銳不可當。顧後軍不繼。乃勒兵以待。景隆忌能成功。以大軍未至止之。於是燕軍連夜汲水灌城。天寒冰卒。合明日。南軍欲登城不可得矣。景隆率師駐白溝河。與燕軍迎敵。能父子奮躍所向披靡。殺傷燕兵甚眾。日已暝。各收軍還營。王曰。勝負常事耳。彼軍雖眾。

明日保能破之。至期麾精騎數千突入。高煦率張玉等軍齊進。玉先以七騎馳擊之。南軍飛矢如注射王。馬三被創而三易之。幾為能所及。薄暮能復引眾躍而前。大呼滅燕。斬其騎百餘人。越雋侯俞通淵陸涼衛指揮滕聚復引眾赴之。會旋風起。王見其陣少動。乃以勁騎繞出其後。突入馳擊。遂斬能父子於陣。聚亦死。贊曰。大風驚沙。此殆天意。汲水水城。亦有人事。勇哉。戩鵬。及能父子。克敵有餘。惜矣。徒死。

莊得 楚智 張能 小馬王



宋瑄

周拱元

徐讓

衛健

韋諒

何清

蘇巘

平元

莊得洪武末為西涼都指揮。召至北平。為燕兵右翼。出塞有功。建文初。隸宋忠麾下。懷來之戰。惟得一軍獨全。後盛庸夾河之捷。得奮力助庸。斬大將潭淵。已而北師以勁騎乘暮掩擊。得力戰死。楚智洪武中稱驍將。數出塞有功。歷陞都指揮使。建文初守北平。尋召還。從李景隆統騎兵禦北師。輒奮力戰。夾河之役。死於陣。張能以都指揮充偏將。力挽千斤。每遇北兵。輒揮

皂旗先登。軍中呼為皂旗張。轉戰山東。屢有俘馘。至夾河力戰死。猶執皂旗不仆。北軍異之。小馬王失其名。以常騎一小馬。故名。官指揮。臨淮人。白溝河之敗。脫胄。付其僕曰。吾為國死。以此報家人。立馬豎鎗而死。宋瑄。鄆國公晟之長子。建文中為府軍右衛指揮使。數從諸將禦北兵有功。戰於靈壁。瑄披甲躍馬。先登。斬首數級。已而諸營兵敗。瑄格鬪力盡死。靖難後。晟功名大著。封西寧侯。求樂中兵部上列侯子孫名乞嗣。封瑄子當嗣。

文皇惡瑄。以弟瑋嗣之。

周拱元。沅州人。少讀兵書。出入辰沅蠻中。交易蠻人信之。建文元年。應募入京。試騎射。荅策。授錦衣衛鎮撫。軍前効勞。占候輒中。主將令引步兵防餉舟。靖難後死之。

徐讓為山西布政司理問。材氣磊落。有口辯。應募賣書物至北平。議和解兵。受而不答。

衛健為山西孝義縣丞。讀書達吏事。膽智過人。亦應募至北平。還與徐讓竝授衛鎮撫。赴軍前差遣。皆戰歿。

韋諒都指揮。率萬人運餉。援房昭於水西寨。

燕王聞之曰。昭得諒兵。不可圖矣。乃統將士先擣諒寨。諒走死。

何清亦都指揮。死於白溝河。千戶蘇瓛死於德州之陣。

平元百戶谷王開金川門迎燕軍。元拒戰死。

贊曰。糾糾武夫。裹革是誓。蹙陣陷堅。洞膺決背。人疇不死。貴得死所。賁父有誅。以愧竄鼠。

楊本

唐禮

薛鵬

弟鳳

丁良

朱彬

朱榮

花英

鄭琦

王恭

詹忠

賈榮

詹璟

哈三帖木兒

林帖木兒

婁鬼里

張昌

楊本河南中牟人。或曰浙處州人。初為太學生。精於遁法。建文初募才畧士。本應募。授錦衣衛鎮撫。時吳王撫軍。一日。本請王觀兵。及登臺。見大水淼茫平階。一軍皆不見。本曰。此水道也。及帥師北征。本常持一鐵棒。重三十斤。臨陣馳突。北兵披靡不敢前。自南北交戰。諸將皆敗。惟本與平安有功。李景隆忌本不以聞已。而本約日出戰。諸軍為後繼。景隆謂諸將曰。今日譬之一園瓜。我輩種熟。乃為

他人採去耶。竟不救。本上疏畧曰。刑屬三千。罪莫大於不孝。人倫有五德。莫大於盡忠。忘君虐民者。不可以不懲。喪師失律者。不可以不罪。今都督袁宇。與耿炳文喪軍士二十萬於燕地。

皇上憐其故舊。不忍加刑。徐輝祖征燕。私存姊妹之情。虧喪士馬。及召還京師。命大教場操練軍士。李景隆四月進兵。喪失軍馬無限。及責問。乃歸罪臣下。乞假臣為大總兵。召募義勇。凡先鋒叅謀軍政。稽考等官。臣自當保舉。仍特命親王為監軍。疾馳燕師。則可免生民於塗炭。奠宗社於太山矣。本遂

皇明世法錄 卷九十三
三
帥孤軍獨出。被擒繫北平獄。後濟南失利。趙王奔還北平。恐人心搖動。索本殺之。文皇大怒。蓋愛其才畧。欲用之也。

唐禮。歷官都指揮。徐凱滄州之敗。盛庸引兵出德州。營於東昌。令禮將騎兵殿後。而以孫霖爲先鋒。營滑口。靖難兵夜襲破之。擒禮。

薛鵬亦指揮。戰於汶上。被執。送北平。弟鳳自縊。丁良朱彬皆指揮。從何福與燕將陳文戰於小河。福斬陳文於陣。燕將張武見文戰歿。率勇敢士自林間突出合擊。遂擒良彬。

朱榮都指揮。守真定。與燕兵戰。被執。械送北平。道死。

花英亦都指揮。定州之役。英與都指揮鄭琦王恭指揮詹忠皆被執。送北平。英自殺。琦恭忠死獄。

賈榮湖廣興國人。爲指揮。建文三年。與燕將朱能戰於衡水縣。被擒。送北平道死。

詹璟亦指揮。燕兵拔東平。璟被執。送北平。尋死。

哈三帖木兒胡騎將。隸火耳灰麾下。素號驍勇。從平安戰於淝河。安斬燕將王真。引騎兵三千。駐北岸高城。燕王以數十騎當之。耳灰持矛直趨王前。

相距十餘步。燕將童信引弓中其馬。馬蹄遂生擒耳灰。三帖木兒持稍突來救耳灰。信復射之。人馬俱仆。并擒之。三帖木兒死。耳灰降。張昌一名長壽內官。爲真定監軍。被執道死。

贊曰天命已去。鼓聲不揚。如熊如羆。縛同羣羊。寧爲纍纍。無爲生降。魂兮歸來。茫茫帝鄉。

從亡列傳

昔徐偃王愛民無權。曰吾賴於文德。而不明武備。及走死彭城。羣臣從之不忍去。中山君出亡。挈戈隨死者二人。雖曰得士之報。要於大誼有不可解者。若夫枕股易堞之事。君則失矣。臣亦未爲得也。趙襄子賞功。高赫無功而上賞。曰拘厄之中。惟赫也不失臣主。噫。臣主之義。無所逃於天地之間。寧得以有位無位論耶。五蛇從龍。周流天下。四蛇入穴。皆有處所。亦計及十九年後之富貴耳。孰與程濟輩三十七年之窮老且萬死哉。善乎宛支之臣。

言曰。我君是事。非事國也。臣曰。從君。豈曰從國。作從亡諸臣傳。

程濟 葉希賢 楊應能

程濟。陝西朝邑人。有奇術。洪武末。以明經舉為四。川岳池教諭。岳池去朝邑數千里。濟寢食在朝邑。而治岳池學事不廢。建文初。上書言某月某日。西北兵起。

朝廷謂非所宜言。繫至京。將殺之。濟仰面大呼曰。陛下幸寬臣。至期無兵。臣死未晚。遂下獄。已而兵果起。赦濟。以為翰林編修。充軍師。護諸將北行。與靖

難兵戰於徐州。大捷。諸將樹碑敘戰功。及統軍者姓名。濟一夜往祭碑。人莫測其故。及

文皇過徐。見碑大怒。趣左右椎碑。再椎。遽曰。止。止。為我錄碑文來。其後按碑族之。無得脫者。濟姓名正。椎脫處得免。曩之祭蓋禳之也。淮上諸將敗。濟還京。

建文君急召濟入問計。濟曰。天數已定。惟可出走耳。立召僧為君祝髮。濟從之出。每遇險。以術脫去。相從數十年。濟嘗病。君親為煮糜。有所往。必令濟筮。後隨君至南京。人尚有識濟者。指之曰。程編修。已



而踪跡遂絕。濟自敘其從亡之事云。兵入金川門。帝徘徊殿庭。欲自殺。召羣臣問計。濟請出亡。帝曰。敵兵四集。且朕病足不能行。柰何。濟曰。臣素習遁甲。出南方可免。少監王鉞以所藏

高皇遺篋爲請。

帝卽命取發之。有僧牒衣具三。

帝曰。數也。時與御史葉希賢。吳王教授楊應能。各符各祝髮。分其牒。濟袖出黃冠自易。羣臣知其事者五十餘人。皆願隨亡。

帝令散去。以太子付廖平先行。

帝獨與濟及梁良用潛出西華門。詣河得空舟。良用鼓柁而行。抵南門。舍舟而塗。良用自赴水死。濟掖帝出城。夜走神樂觀。宿道士王昇軒。應能希賢及金焦吳成學趙天泰蔡運梁中節梁良玉梁田玉宋和郭節馮灌王資牛景先劉伸郭良史仲彬鄭洽王之臣黃直內官周恕何洲皆會。

帝曰。此後以師弟稱。各訂約散去。適仲彬家有舟在通濟門橋下。師入舟。楊葉鄭史程五人從。時壬午六月十四日也。泝江繇丹陽抵吳江。至彬家。彬棲師於別所水月觀。師賦詩曰。細雨披楊起綠烟。水

文如織影迷簾。午鍾何處偏來耳。不似西宮奏管絃。成學來會。亦已祝髮稱雪菴。尋辭去。師以詩送之。至八月。縣丞鞏德來彬家踪跡。師同賢能濟附舟至京口。渡江。從六合陸走襄陽。入廖平家。曰吾僧也。奎當易姓。平寓師於西山中。景先亦至。居無何。平舉家遁遷。師留景先於山中。自與濟賢能入蜀。遇馮灌於途。知其寄食村中。留三日而去。癸未正月。投雲南永嘉寺。命灌訪廖平家事。夏六月。灌來。知梁良玉死。甲申正月。離雲南。三月到襄陽。就景先於西山。五月命景先入吳約仲彬。六月師行。

八月至彬家。師一宿遂行。彬問奚速。師曰。昨道中遇一冠蓋者。瞪目視余。我去正爲爾也。相與泣下。與濟先行。賢能景先仲彬。以次會於吳山。同遊西湖。重九登天台。運焦灌仲等皆至。運亦祝髮稱稽山主人。灌稱塞翁。遇廖平於耶谿。冬離台州。乙酉二月至重慶。雪和尚已結菴於善慶里。遂留居焉。夏六月將往雲南。命濟筮之。得乾之姤。曰恐有偵我者。已胡滌鄭和果入雲南。遂止不往。冬十一月黃直至。留三日去。丙戌三月。別雪行。夏四月至西平侯晟家旬日。嚴震直以使事過滇。見師辭去。吞

金死旅舍。晟恐請師逸。五月能賢結茆於白龍山。師居之。丁亥三月師病。七月濟乞食。出遇郭節。程亨史仲彬來視。八月節亨辭去。十二月師祭死。難諸臣爲文哭之。戊子二月仲彬歸。夏六月菴災。七月濟出募葺菴。道者張靜成之。濟筮得小過之旅。曰鳥焚其巢。不久將毀。冬十二月焦雪黃直皆至。己丑正月師東行。畱賢能守菴。濟及雪直焦從。三月至善慶里。雪畱。五月至襄陽。知廖平家徙蜀。庚寅三月師還菴。辛卯春有司毀菴。夏四月師至浪穹。賢能募建菴成。濟筮得剝之坤。曰剝盡而順。吉。

卦也。然龍戰之詞有凶。壬辰三月能卒。四月賢卒。師哭之慟。並葬於菴東。師納弟子應慧。十一月灌直來訪。癸巳正月辭去。五月師南行。至旬。濟及慧從。六月還菴。納弟子應智。十月鑄應明鐘。師爲銘篆之。甲午秋師學易數。冬慧死。納弟子辨空。乙未春三月師夢賢能慟而覺。設奠祭之。夏師出遊。路逢灌直。畱其王家數日。八月師與濟遊衡山。還訪灌。灌已先赴滇。師卽還滇。偶寄宿蕭寺。見廡下有二病者。視之卽灌直也。因畱視之。灌直竟死。埋於寺東。師題其石曰兩忠之墓。十月還菴。立從亡死。

者之。主於舍東丙申冬命濟述從亡傳藏之山巖。師自敘之丁酉二月別築靜室於鶴慶山中。七月雪和尚弟子了空來。知雪已卒。冬十一月胡滌鄭和復至滇踪跡。師往衡山作感慨詩曰。我行自東山。深海窮。虎跡蛟蹤。我行至南。地炎河乾。猢猻巢環。我行至北。黑霧毒靄。燭龍沉色。我行至西。陰雨霏霏。弓矢野施。我悽我惶。何道可行。嘻何道可行。戊戌三月返至黔。五月命濟圃師作菜根歌曰。菜色青兮。菜根辛兮。菜兮菜兮。似予情兮。己亥師註楞嚴法華經。署曰文和尚。九月命濟輯禽遁諸書。

不果。庚子七月仲彬來訪。八月歸。十月師與濟遊蜀登峨嵋。師吟云。登高不耐東翹首。但見雲從故國飛。辛丑四月復入蜀。七月入粵遊海南。冬還菴。師畜髮爲道士。日讀太玄莊老。壬寅春遣空智主鶴慶靜室。師別居淥泉。癸卯二月師與濟遊楚。登章臺山。師吟云。楚歌趙舞今何在。惟見寒鴉遶樹啼。六月遊漢陽。登晴川樓。師吟云。江波猶湧憾。林靄欲翻愁。七月畱大別山。甲辰二月東行。九月遇仲彬於途。十月至仲彬家信宿。彬族人弘送至杭。十一月師與濟至寧波渡海。乙巳正月朔謁大士。

皇明世法錄 卷九十二
於潮音洞。師作大士頌曰。以音觀音。音何所起。以
觀觀觀。妙明無跡。五月自閩粵還山。十二月命濟
出丐。丙午三月。命濟往河南。視王資金焦。六月濟
還知資焦已故。八月祭從亡諸人於菴。丁未二月
師移居鶴慶之靜室。命空智還主浪穹。四月師復
祝髮。八月滇寇亂。師與濟入蜀。冬宿永慶寺。詩云
杖錫南遊歲月深。山雲水月傍閒吟。塵心銷盡無
些子。不受人間物色侵。戊申春。聞仲彬獄死。遙祭
之。秋遊黃牛磯。咏詩云。嶺猿夜泣湍波急。樹上霜
紅含淚色。雲愁烟慘雨冥冥。野老吞聲談故國。冬

十月遊漢中。遇廖平弟年。乃知平已死。會稽奎妻
平妹三歲矣。己酉五月。還浪穹。菴已焚毀。六月到
鶴慶山中。九月師復蓄髮。庚戌四月。師欲廣其菴。
濟空出募。七月室成。師顏之曰潛志軒。辛亥二月
師遊陝西。濟從。四月至延安。七月返至蜀。九月至
夔絕糧。有二黃冠給之。壬子正月入楚。至公安。宿
蕭寺。二道士同宿。不相識。既去。覩遺紙。知爲郭良
梁中節。師作蕭寺黃冠夜泣詩。五月師至武昌。登
黃鶴樓。仙棗亭。有何年化鶴歸之句。八月舟下九
江。九月復遊吳山。十一月遊天台。畱赤城觀。癸丑

皇明世宗 卷九十三
師在赤城甲寅五月至吳江訪仲彬之子晟雷五日。八月還至夔。十月還山。乙卯三月師遊粵西濟從。七月濟遇何洲於市洲隨行。十二月洲死。丙辰八月還滇。仍卜築浪穹。丁巳二月師復祝髮欲東歸。命濟筮得兌之歸妹曰。此女子之貞。男子則否。三月從師入漢中。五月遊峨嵋。十一月還至浪穹。戊午冬智道師恐踪露。遂入粵。濟從。己未正月濟勸師還滇不果。庚申春師決意東歸。復筮得歸妹。濟拊几曰。大凶。夏。師題詩寺壁。有僧冒之。自詭爲帝。藩司以聞。

詔械入京。同寓寺者皆逮。師預焉。八月至南京。濟從。九月至京。御史鞠僧年不合。僧名楊應祥。鈞州白沙里人。以不實論死。餘各戍邊。師不得已。遂陳其實。御史上聞。命中官舊侍者吳亮。詆視師語。疇昔事數條。亮大慟。不能語。密返奏。

詔迎入大內。稱老佛云。濟聞而嘆曰。今日方終臣職矣。還滇。焚菴散徒。平葉楊二塚。紀始末以付了空。名從亡隨筆。其詞甚繁。錄其畧。以附濟傳後。

論曰。從亡二十三人。惟程濟始終。雖饒智數。實其心忠也。濟載師於重慶。病痢。雪和尚以栢葉丸進。

三服而愈。結茆白龍山時。師復病痢。不得前藥。濟
煮栢葉湯療之。師又慟念方黃諸臣而病。逾年始
愈。郭節程亨史仲彬來訪。見師骨立。皆環泣。及濟
病。師坐榻旁。不刻離。濟曰。濟不死。濟何敢死。顛沛
君臣相依為命如此。嗚呼。

贊曰。臣也抱足。君也煮糜。一心相從。萬死不移。探
易之秘。決策以寄。為贛為璞。匪夷所思。
葉希賢。浙江松陽人。以進士為御史。侃侃自負。建
文中屢疏言用兵事。又嘗劾耿李二大將失律。
楊應能。河南杞縣人。為吳王教授。壬午六月。京師

隨陷。與希賢同日祝髮從亡。初亡出時。諸臣皆衣
葛。重九夜。宿六合草店中。濟抱君足睡。盡出葛衣
覆其上。君倡詩曰。黃花滿地帶霜開。濟賢能各
成一句。闕已從君往來。吳楚蜀滇間。死鶴慶。並埋
於浪穹。

馮時可曰。婁江王元美嘗謂余。
建文竇焚於火。世所傳髡緇為僧者。謬然歸自田州
葬於西山者。又何人邪。余以癸未遊黔西。永洪菴。
其菴在萬山深處。僧徒皆謂建文曾駐此三十年。
尚有墨迹。後自滇而粵。不知所往。又云君初來時



皇明世法錄 卷九十三
兩比丘與俱未幾卽去所謂兩比丘者抑葉與程
耶初相從卒相散者豈當時物色之急不能終捍
牧圉邪嗟夫君臣之誼譬之父子厥考質首之雉
厥子回面而改嚮此直禽鹿視肉寧有人理故當
死則死之不當死則逃之要以成其仁而已公之
削髮狗主其西山采薇之節哉爲之贊曰神鰲失
足亢龍無首天地變易臣軀何有回面事仇亦孔
之醜噫歟先生遭世陽九周粟何甘秦庭難走遊
方之外緇流爲友彼人奴哉甘心廣柳
君嘗依聯師匿跡杭之淨慈寺寺有君遺像禿而

髯相傳謂君髯不可剃剃則刀捲其口像頂有五
岳骨云聯師國初十高僧之一胡滌有塔銘新都
畢懋康記。

君又嘗偕徒衆住雲南會城五華寺深藏不與人
接漸有疑之者乃移羅婺之獅子山居頗久以土
官鳳氏意稍懈復移去壁題悉爲鳳剷滅按
文皇愛壻稱五駙馬者卽沐黔寧子昂下西洋鄭和
卽滇昆陽人而二人若不聞有寓跡者噫當時人
心大可見矣滇人王來儀記。

贊曰草莽君臣間關生死朝夕一堂靡進靡已生

皇明世法錄 卷九十三
也同袍死也同壘彌茨骨香千秋不毀

廖平 王玘 吳成學

廖平襄陽人建文時爲兵部侍郎城陷之日携太子出奔有程嬰之俠

建文君嘗一至其家平盡棄其業全家逃徙漢中而身自流於會稽日賣薪以給食已復遇君於耶溪因號曰耶溪樵嘗畫詩於溪沙隨自亂其沙不使人知一日爲人所窺從後抱持之乃識其詩云夢入鴛班覲紫宸覺來依舊泣孤臣半生家國惟餘我萬里江山已屬人無地可容王蠋死有薇堪濟

伯夷貧伶仃苟活緣何事要了熒熒一點真竟死會稽山中

吳成學浙江人舉賢良爲翰林院修撰壬午六月之變家人驚潰相失以爲已死成學隱姓名爲僧號雪菴會

建文君於吳江臨別君送之詩云江水無情去不還惟畱兩岸好青山輕雲藏跡能歸岫不向東風見素顏走重慶之善慶里有隱士杜景賢異之與遊白龍諸山山有松栢灘灘水清駛蘿篁森蔚和尚愛之景賢爲造菴和尚招徒數人入居之昕夕誦



皇明世法錄 卷之三
經諦聽之則易乾卦也。景賢曰：和尚相釋而誦儒不可和尚會其意，乃誦觀音經。

建文君常留止菴中，因題曰：觀音菴云。和尚好觀楚詞，時時袖之，登小舟急棹灘中流，朗讀一葉，輒投一葉於水，投已輒哭，哭已又讀，終卷乃已。景賢固知之，然亦不問。和尚不戒酒，景賢時送酒飲之，拉牧豎共飲，飲半，酡呼兒童歌曰：我歌爾和，歌竟瞑然而寐。和尚頎形秀爽，指柔白，剪剪落筆成章，意氣渙發，能感愴人。卒秘跡以死，莫有知者。嘗走滇謁

建文君，惟徒了空知之。成學之亡也，曾宿御史王

玘家，事覺玘以匿奸黨論死。玘蘇州人。

贊曰：越之溪，蜀之灘，沙湛湛，水潺潺。趙客俠楚騷，酣生若寄，死何慙。越山險，蜀道難，兩相視，無一言。

馮灌

黃直

王之臣

馮灌，黃巖人，刑部司務。京師陷，出亡在夔州，以章句課童子，給衣食為對句，及古詩，自題馬二子，或馬公，或塞馬先生。

建文君嘗留其村中三日。灌亦間辭主人往楚，滇視君一見即返，嘗大書壁間詩曰：夜夢何奇特，龍飛

天漢津朝橫滄海曲。夕過滇池濱。光霽皆五色。蜿蜒無損鱗。淵田變化間。張主藉高旻。比見補鍋匠。歸卽剗去。乙未秋與補鍋匠同客死滇之蕭寺。黃直常州人累官至侍中。尋改爲按察使京師陷遁去。往來夔慶間爲人補鍋。至州邑不過三日卽去。去或復來。人有學補鍋者卽教之。不索謝錢。直令負擔從。有後曹學者卽遣先學者去。如是數年。夔慶人皆呼爲老補鍋。補或與錢布米。皆不擇。當食時與食。卽不復索錢。遇風雨寒暑不出。出囊中錢買酒自飲。嘗寄宿蕭寺。忽市逢馮翁。二人相顧。

愕然已而相持哭。相牽入山巖中坐。語竟日已。又哭且別。言勿復相見。後客死滇寺中。王之臣襄陽人爲欽天監監正。京師破衣葛衣走出。亦與聞出亡之約。

建文君嘗一至其家。事露之。臣棄其家。走金城行乞市中。邊地極寒。常衣葛衣不改。已而過河依莊浪魯家爲傭。取傭直買羊裘披之。必覆以故葛衣。夏或衣暑布布卽新故葛衣仍覆其上。葛益破縷縷。竟不肯脫傭力倦時自吟哦。或夜聞其哭泣聲。有畱都官從宋總兵至莊浪識傭。欲與語。傭匿避旬。



月。俟其去乃還。有問留都官。備何人。留都官亦不
答。在莊浪數年。病欲死。呼主人謝曰。我死火我。無
埋我骨。魯家從其言。
贊曰。泯泯者名。烈烈者志。漆身吞炭。古有其事。三
人同晦。各行已意。或哭或歌。灑血成漬。

蔡運

梁田玉

郭良

梁中節

蔡運。南康人。貢起家。歷官四川叅政。清勁直諒。不
諧於俗。罷歸。起賓州知州。有惠政。壬午六月。與聞
出亡之事。祝髮隱會稽雲門寺。因稱稽山主人。每
令童子携茗椀筆牀。泛舟而遊。賦詩滿袖。歸則焚

之。

梁田玉。定海人。歷官刑部郎。

建文君出亡。田玉與蔡運。馮灌。趙天泰。吳成。學史。仲
彬。俱為往來通信給食之人。田玉亦髡髮為僧。避
跡無常處。

郭良。梁中節。皆定海人。同為中書舍人。壬午六月
與聞出亡之事。並棄官為道士。兩人曾於公安夜
宿佛寺。

建文君亦宿焉。時改服為黃冠。兩人不識也。夜漏將
三鼓。微聞兩人泣聲。既去。留姓名於紙。君始知之。

皇明世宗 卷九十三
作蕭寺黃冠夜泣詩。詩曰。壬子春正十三日。寺遇黃冠不相識。結蒲拄杖坐西偏。低頭不語意自閒。亡何一人復冠籜。髮黃面縐多愁顏。拊掌遽驚還。嘆息漏分但聞聲。唧唧似懷萬斛愁。難傾哀猿夜叫寒鴉泣。余腸縈結詎堪言。布衾溼透皆淚痕。晨興往探詢其苦。兩公蹤跡雲無根。空餘蟬斷字數箇。依稀恍是亡臣名。我欲把毫悉胸臆。冰凍筆花寫不得。

贊曰。緇衣黃冠。皆可晦跡。其名則隱。其志如石。冥冥霞舉。何必仙釋。

梁良用

宋和

郭節

梁良玉

梁良用亦定海人。載

建文君抵南門。自投於朱雀橋下。良用與中節田玉良玉同族父子兄弟八人。同仕於朝。而投水死者五人。後松陽王詔遊治平寺。聞轉藏上有聲。異之。令人緣頂得書一卷。載建文出亡臣僚二十餘人。紙灑爛不可讀。稍銓錄可識者。得良用等。各為贊。題曰忠賢奇秘錄。

鄭曉銘曰。今吾故吾。知我者誰。瘠若漆身。希蹤採薇。戢戢潛龍。寥寥冥鵠。豈吝箕疇。而其漢卜。山椒

水滲天涯海濤會其可逢鼓以南音肯欠一死以明我心白霓晝見虞淵沉沉孰呵護此悠悠古今宋和臨川人郭節連州人皆中書舍人也同與出亡之約各變姓名挾卜筮書走四方賣卜給衣食和時稱槎王節亦稱雪翁節嘗同史仲彬程亨視建文君於白龍山茆舍

梁良玉亦中書舍人京師陷棄妻子易姓名走海南市肆粥書為業出亡之明年夏即死

建文君以詩哭之云子犯歸黃土重耳未還時

贊曰栢舟載沉匪江難涉卜市可藏匪書是業一

死一生其志則合

王資 牛景先 劉伸

王資河南杞縣人以指揮從偏將防守淮北有齊力善騎射靈壁之役率步卒護軍餉諸將敗輜重芻糧委棄狼藉資被執遁還又從徐安防禦鳳陽奏事京師與出亡之約易服為道人隱金華玉華山疑即玉華山樵別見隱遁傳

牛景先沅人初為御史改鎮撫禦靖難師有功建文君出亡景先首贊之初議從鬼門出門猝不可啓景先多力即破之神樂觀中之約景先與焉易

道人服。夜走丹陽。遇一僧云。徐行吉速行。凶遂改。姓名徐行。後從君於廖平家西山。平以君託景先而遁。及君南行。景先獨止西山二載。已又從君於吳於越。死杭州寺中。初景先亡命時。朝議微聞。破鬼門事。逮治其家屬。次妻劉氏發教坊司。

劉伸亦杞縣人。鎮撫同王資出亡為道人。甲申同諸亡臣侍。

建文君遊天台。遂留寺中以老死。贊曰。力不從心。命也。非戰義有所歸。家亦何戀。瘁矣。閭關剛哉。百練黃冠者誰。愧彼纓弁。

金焦

趙天泰

鄭洽

程亨

徐貞

金焦。貴池人。建文元年為御史。燕兵起。尹昌隆上疏請讓位。焦劾昌隆無人臣禮。尋陞刑部右侍郎。又論李景隆懷貳不可任。壬午六月之變。焦亦與聞出亡。甲申重九。同諸亡臣會。

建文君於天台。戊子冬。視君於雲南白龍山菴舍。明春從君於蜀。因留蜀。後與王資往河南。死於祥符。趙天泰。陝西三原人。建文元年。以明經為翰林院編修。出亡之日。天泰與焉。時衣葛。因自稱衣葛翁。

皇明世宗錄 卷九十三 吳
又號天肖子。老死於蜀。

鄭洽。浦江人。爲翰林院待詔。與聞出亡。同聚神樂觀。議迎。

建文君至家。君甫至而堂中扁。無故墮地。君驚而逸。尋跡者至。無所得。乃舍洽。洽尋訪君於蜀道。病留公安茅菴中。遂卒。

程亨。山西澤州人。張昺之親也。任爲翰林院簡討。初未與出亡之約。京師陷。亨棄家逃。及昺被族等抄亨家。逮亨妻楊氏。子程禮禮。妻張氏。用火燒死。亨就郭節於連州。丁亥。史仲彬與何洲至節家。求

訪

建文君。亨適在焉。相持痛哭。遂偕節四人同詣重慶。不值。又走雲南。遇程濟於白龍山深處。引拜君榻前。見君形容憔悴。各慟哭。留一月辭歸。

徐貞。陝西人。爲工部尚書。

建文君出亡。留貞家。信宿。事覺。族誅。又命教坊羣亂其妻。至死。有幼女。婢隸樂籍。樂官陳儀陰養之。不令汗。洪熙初。遇赦。儀爲擇嫁良家。儀在穢籍。而能執義如此。

贊曰。焦旣削迹。泰亦埋名。周旋艱險。洽亨一心。貞

之遭戮亦以居停依依故主蹇蹇孤臣死而後已。豈曰倖生。

史仲彬

史弘

王昇

史仲彬。吳江人。洪武戊寅。以明經爲翰林院待書。建文元年。遣祭告衡山。與金華樓璉同諫改官制。嘗廷斥尹昌隆爲奸。二年。疏請均江浙賦役。改徐王府賓輔。三年。副工部尚書嚴震直轉餉山東。回奏機密十二事。壬午六月庚申。廷議避難。彬與樓璉皆言死守勿去爲正。又與御史魏冕力請誅徐增壽。城陷。

建文君倉卒出走。仲彬會於神樂觀。越宿微明。與牛景先步至河畔覓舟。適家有僕舟至。遂載君繇江行抵彬家。時徧籍在任諸臣。遜去者四百六十二人。卽日削籍。戒無齒及。隨行文各州縣追繳革除。誥敕。至是吳江邑丞鞏德來彬家。私問彬曰。

建文帝在君家否。微哂而去。時八月十五日也。君卽逸去。仲彬一視君於襄陽西山。一同何州視君於雲南白龍山。一視君於大理浪穹。一視君遇於湖廣之逆旅。君亦再至彬家。後爲里人所訟。下獄死。死後君復至其家。適子晟婦生男。君命其名曰鑑。

史弘嘉興縣民彬之族祖也甲辰冬

建文君時為黃冠至彬家方坐飲食弘突來識之私

問彬曰此

建文皇帝也吾曾於東宮見之當吾家籍沒時非是

吾無死所矣彬以實告弘稽首堂下涕泣問向來

狀君曰賴隨亡數人給我衣食周旋艱險二十年

來戰戰兢兢今想可老終矣弘問何之君曰欲遊

天台弘曰願具一日之積隨行至越江而別

王昇神樂觀道士

建文君賜今名命為提點君出亡昇候於途曰臣昨

夢

高皇帝緋衣御奉天門令兩較尉縛臣詰曰汝職提

點秩六品謂何明日午後門外伺候周旋勿失也

昇導君步行止觀中薄暮從亡臣葉希賢等十三

人至翌晨金焦等至共二十三人時國兵新破各

門出奔甚多無誰何者尋得史仲彬僕舟於中河

橋畔君遂行

論曰史仲彬有致身錄所紀

建文君出國門事與程濟所紀稍戾意當時所謂鬼

門者亦疑兵也觀牛景先家得禍可見噫錢之啓

昇之夢。豈非

皇祖之靈。於昭不爽乎。仲彬不易服。不遠遯。終始周旋。以一死畢事。真可謂能致身者矣。

贊曰。有君周旋。可以無斃。全家完業。可以無棄。皇皇盡瘁。可以無愧。

王鉞 何洲 周恕 吳亮

王鉞。內官監少監。當


建文君皇急時。鉞啓奉先殿有紅匣。奉

太祖遺諭。臨大難。發之。亟命昇至。匣四圍錮。以鍊牢。不可啓。羣以足蹴碎之。髡緝之具畢備焉。君遂易

服。辭羣臣。

何洲。周恕。皆海州人。同為太監。建文初。燕世子來朝。恕請留之。君不可。以問王子澄。亦以為不可。遂放還。燕兵起。君曰。悔不用恕言。壬午六月。君出走。神樂觀。洲與恕追侍焉。君命散去。各變姓名。走湖湘間。恕病死。蕭寺。丁亥春。洲與史仲彬訪君於粵西。至連州。遂偕郭節。程亨。至蜀。不值。乙卯秋。洲鬻書於桂林市。遇程濟。引見君。勸君還江南。時洲年七十餘。是冬死。

論曰。鄭曉。吾學編餘云。靖難兵起三年。屢戰多勝。



皇明世宗金 卷九十一
然所過城邑。往往堅守不下。間克之去。卽復爲朝廷所據。惟北平永平保定三郡而已。有內官密言於燕。直擣京師。約爲內應。天下可定。於是壬午春。舉兵直趨京師。意有所屬。而朝廷不知也。兵旣入城。天下大定。內官言功不已。

文皇慮之。未幾。諸有謀者皆爲邊藩鎮守。假以大權。賜公侯服。儕於侯伯之上。永樂末。太監沐敬語漸不遜。

上舍之不治。蓋敬亦預謀者也。及攷王鉞何洲周恕。乃心建文如此。嗚呼。安危之際。豈不以人哉。

吳亮亦內官也。建文遜去後。

上疑匿僧溥洽所。永樂四年。以他事禁錮溥洽。命胡濙以訪張邈。邈爲名。別命太監鄭和下西洋。徧物色之。二十一年。濙從均襄還朝。

上時駐宣府。濙馳夜上謁。

上已就寢。聞濙至。披衣起。召入。賜坐與語。濙言不足慮也。

上疑始釋。正統四年。

建文君在粵西。謀東歸。程濟筮之。得觀之否。濟曰。所謂利用賓于王也。不宜變否。中互艮巽。艮止而巽

入。艮爲寺人。當遇此兆。明年庚申三月。又筮之。得兌之歸妹。濟曰。歸妹序卦之盡也。師今年適六十四。春季木將盡。至夏火旺子生母死。且太歲干支皆金。火必尅之。夏其危乎。五月廣西藩司以事聞。命取入京。以亮曾侍君。使往詠視。君見之曰。汝吳亮耶。亮詭非是。君曰。我昔御便殿。食子鶯。棄片肉於地。汝時執壺。狗餽之。何謂不是。亮伏地哭。不能仰視。復命畢。自經死。命取老僧入西內。卒葬西山。不封不樹。

贊曰。鉞也。發匱。亮也。伏哭。出之。入之。窮反而復。壬午庚申。中更六六。乃有洲。怒周旋碌碌。此何人哉。亦用臣僕。

水風對美

中更

隱遯列傳

孔子謂殷有三仁。蓋以行遯靖獻與披髮剖心。其趨一也。薛方有言。堯舜在上。下有巢由。雖一時婉拒之辭。亦各成其志也已矣。當夫鼎革方新。黨禍斯烈。君臣大義。既不敢希。胡解之榮。宗祀至情。又不忍見。方黃之慘。不得已而思其次。遯之時義。是或一道也。峨嶠亭詩不云乎。一個忠臣九族殃。全身遠害亦天常。夷齊死後君臣薄。力為君王固首陽。蓋情見乎辭矣。悲夫。塞馬先生。補鍋匠。河西傭。從王為重。遯世所不必言。若高彭諸人。或憔悴江

皇明世宗錄 卷九十二
海。或容與丘樊。而立意較然。不降不辱。使死者復生。生者無愧。豈必結一途之迹。乃稱同哉。作隱遜諸臣傳。

徐厚

高遜志

韓郁

豐寅初

胡子義

東海逋臣

玉華山樵

洞庭居士

徐厚字宗實。洪黃巖人。洪武中應聘赴闕。

高皇嘉其通達治體。授風紀官。厚辭授銅陵簿。謫淮陰驛丞。郡邑士子多所造就。召見獎諭。屢聘主文衡。陞蘇州府判。擢兵部右侍郎。疏請移整風俗。罷去不急。振舉廢墜。裁定賦稅。撫安農業。開政教之

路。塞異端之源。進賢退不肖。皆切時要。北師起。奉使招集兩浙義勇。靖難後。家覆沒於京師。厚義槩侃然。杜門終老。或云歸二載。逮至京。卒於旅。

高遜志字士敏。徐州蕭縣人。元末僑寓嘉興。好學問。受業宣城貢師太鄱陽周伯琦。遂昌鄭元佑。爲文深純典雅。成一家言。年二十五。爲鄮山書院山長。洪武二年。徵修元史。爲翰林院編修。累遷侍讀學士。建文時。爲太常寺少卿兼學士。與董倫同爲庚辰會試考官。稱得士。靖難後。倫歸附。遜志遁去。不知所之。或云自經死。

皇明世法錄 卷九十三
韓郁一曰康郁監察御史建文中上書言豎儒偏見病藩封太重疑慮太深周王廢湘王焚代府被推而齊臣又告王反矣爲計者必曰兵不舉則禍必加是朝廷執政激之使然燕舉兵兩月矣前後調兵不下五十餘萬而一矢亡獲謂之國有謀臣可乎經營已久軍興輒乏將不効謀士不効力九重之憂方深而出入帷幄者方且洋洋自得果何心哉諺曰親者割之不斷疎者續之不堅

陛下不察不待十年悔無及矣幸少垂洞鑒興滅繼絕釋代王之囚封湘王之墓還周王於京師迎楚

蜀爲周公俾其各命世子持書勸燕罷兵守藩以慰

宗廟之靈不聽靖難後遁去不知所終

豐寅初字復初浙鄞人洪武中爲國子司業抗疏諫燈謫德化教諭建文壬午棄官躬耕年百有五歲子慶給事中孫熙弘治己未榜眼

胡子義一名志遠刑部侍郎子昭弟也以薦辟歷官按察僉事聞兄死辟世丹稜蜀獻王聞而憐之令削髮爲僧子義以親遺體辭有子二人生數歲義曰吾兄無後天不絕吾姓二子當免難竟棄去

皇明世法錄 卷九十三
莫知所終。

有題詩神女廟者。襄王此日知何處。空見朝雲暮雨時。自署曰東海逋臣。

玉華山樵。名籍不傳。永樂初。突來金華東陽縣東山。采樵。自稱大呆子。性天然。惟披麻戴笠。不服常服。盤桓於山南村落。將死。囑主人曰。斂吾屍。縣於林木足矣。主人卒葬之。嘗見其歌。稱王姓者曰宗兄。歌云。七年艱難走閩越。日夜思親鬢成雪。回頭往事付空花。形影相隨衣百結。當時恨不早見幾扁舟。一棹江南歸。西風塵土障天起。秋水鱸魚空

自肥。卽今寄食荒村裏。佳士出迎常倒屣。當歌對酒。忍暫歡。握手論心愧知己。老懷豈能忘故山。神遊往往於其間。爲君寫此轉悽惻。片雲零落何時還。

洞庭居士。不知何許人。永樂初。隱於湖濱。後有二人至。居一室。常汎湖。大醉輒大哭。已病死。二人營葬畢。隨去。不知所之。

贊曰。宗實削迹。士敏避榮。韓豐與胡樂。志逃名。洞庭之濱。可以濯纓。玉華之麓。可以負薪。二人伊誰。翩翩其隣。

陳周蘇州人。建文中第進士。與吳僧道衍善。衍因薦辟之。周乃逃隱錫山。終其身。

陳周

劉亨

高賢寧

龔詡

劉亨字嘉會。廬陵人。博通經史。洪武壬戌。以賢人君子徵。辭以親老。得歸養。久之。復舉經明行修。入對。稱旨。命說書於華蓋殿。以言事忤。出為壽州訓導。建文初。應詔上書。言文武並用。長久之計。六卿職卑於五軍。當並為一品。國子祭酒。師表天下士。位不可在太僕下。諸武臣子弟。他日當授之兵。宜立學教之。多見聽用。陞武進丞。修舉學政。勸課農

桑。恤孤寡。表節義。凡淫祠妖妄。皆禁絕之。於縣治旁作善教坊。再思亭。以風勵民庶。三年。上績。賜敕褒寵。壬午中。縣民李德茂。馬阿寶作亂。謀於令。以鄉兵擒首惡十數人。戮之。而諭降其黨。保全甚衆。靖難後。有言亨昔上書改舊制者。罷歸。遂杜門不復出。有薦入館閣。修永樂大典。固以疾辭。湖廣廣東聘為考官。亦皆不就。宣德中。監察御史尹崇高復言。亨有學行。雖老猶可為教官。亨造朝。自言年將八十。不足任教事。

上聞之。曰。伏生九十尚傳經。八十為教官。何不可。亨

懇辭。吏部尚書郭璉。上言老者安之。

朝廷豈少此一人。宜聽還鄉自便。遂得歸。正統中卒。

高賢寧。山東濟陽諸生。受學於教諭王省。建文中

貢為國子生。靖難兵攻濟南不下。以箭射書城中

使亟降。賢寧時在城中。作周公輔成王論。射城外

請罷兵。靖難後被執。

上曰此作論秀才耶。奸人。命官之。賢寧固辭。其友紀

綱時為錦衣指揮。方貴倖。勸之就職。賢寧曰。君以

軍旅發身。余本書生。食廩有年。於義不可。綱言於

上。全其志而遣之歸。年九十七卒。

龔翊。字大章。崑山人。年十七。為金川門守卒。靖難

兵入。翊大哭。道還鄉。隱居教授。宣德中周忱撫吳

兩薦為崑山太倉學官。辭不就。曰。翊仕無害於義。

恐負往。日城門一慟耳。竟隱終身。門人私謚為安

節先生。

贊曰士固有志。何庸相逼。惟陳及劉。老死泉石。卓

哉賢寧。仲連斯匹。析義必精。萬鍾不易。城門一慟。

永矢弗斁。吁嗟大章。高軌屹屹。

王璉

孫鎮

石允常

周縉

朱寧

孫岳

王璉字器之。山東日照人。通經史。尤長於春秋。初仕教授。坐謫。洪武末。以賢能薦授寧波知府。杜私謁。革吏弊。政教兼舉。自奉甚約。一日見饌兼魚肉。命撤而瘞之。號埋羹太守。尤痛繩武人之不法者。故軍衛銜之。靖難兵至江上。璉造船為勤王計。衛吏縛送京師。

上問造船何為。璉徐對曰。將由海道趨瓜州截路耳。上義而釋之。得還田里。

孫鎮。廬州合肥人。洪武中中制科。除戶部主事。時以課程事罪本部官。鎮諫不宜連坐。謫戍雲南。尋

復其官。擢衛輝知府。靖難兵至。抗節不附。壬午秋。謫戍山海。二十餘年。宣德初薦起為上饒丞。不受。號冲玄子以終。

石允常。字恒德。浙寧海人。洪武甲戌進士。歷官河南僉事。廉介有聲。人稱石清潭。時徼行民間。聞哭聲甚悲。廉知其女為閹宦逼奸而死。受其訴聞於朝。捕宦抵大辟。為讒所構。左遷常州府同知。北師起。允常棄官歸已。

朝廷追論建文間廢毀周府官僚事。逮至者五十餘人。允常與焉。鍛鍊百端。堅不肯服。繫獄二年。免死。

謫戍中屯衛。躬操甲冑。幾三十年。年七十年代還。過南畿。感愴病卒於舟中。遺文曰。遇安集。

周縉。字伯紳。湖廣武昌人。洪武中。貢入太學。授永清典史。居官廉謹。攝令事捕蝗。弭盜。靖難兵起。一時守令多迎降。永清地尤近燕。縉極力拒守。而民爭逃散。縉度不可為。懷印南奔。將他圖焉。道聞母喪。還家葬畢。卽出糾義旅勤王。戰艦戎器畧具。聞工師燔乃走。匿民間。已而蹤跡漸露。有司卽其家械送京師。縉自分必死。慷慨就行。至則朝廷特下之獄。久之。謫戍興州。居數年。子代還。屏迹

田園。年八十終。吳文定寬為縉傳。有曰。以愧世之為丁公而倖免者。是時吏部言前北平屬州縣官朱寧等二百九十人。當靖難時。俱棄職遠避。宜寘法典。俱逮戍。縉其一也。寧等不可攷矣。

孫岳。洪武中從大將立功。官至都督同知。建文中充鳳陽守將。靖難兵起。大修戰具。撤寺材為戰艦。樓櫓戈甲。咸有法式。列寨淮西。水陸有備。靖難兵竟從下流渡淮。至盱眙。及金川門不守。岳猶堅守。中都。永樂元年。法司劾岳。逮至京。安置海南。死。贊曰。間關遠戍。是亦志節。我罪可膺。我行自決。豈

皇明世法錄 卷九十二
無新榮。義有不屑。悲彼逝者。泯泯同潔。

彭與明

陳暉

徐真

馬溥

孫成

王貴

孫霖

劉伯完

彭與明。江西萬安人。洪武中由貢入太學。二十五年授兵科給事中。陞刑部浙江司員外郎。建文初陞湖廣按察僉事。尋陞大理右寺丞。與明剛毅敢言。敏達能斷。北師起。擇中朝官知兵有風裁者。出督江北。諸將衆推與明。靈壁之戰。何福軍敗。與明被執。

燕王遣歸。令傳語中朝士。與明慚憤。裂冠裳。棄官變

姓名。不知所之。一曰與陳性善同死。

陳暉。徐真。馬溥。皆建文中名將也。溥。壽州人。父鑑。開國功官。至都督僉事。溥襲武德衛指揮。陞都督。四年暉爲副總兵。真與溥俱參將。從何福軍靈壁。食盡。將就糧於淮。期砲突圍出。適燕師傳砲攻城。軍士誤信。爭門出。軍遂亂。平安及暉等皆被執。械送北平。中道暉真溥與都指揮孫成。指揮王貴等二十人夜遁。各變姓名。逸去。暉始爲洮州衛指揮。累陞至都督。初戰真係滄德。屢勝。靖難後有薦起暉參贊。韓觀軍務。暉匿不出。

孫霖亦指揮為唐禮先鋒。東昌之役，霖營滑口。夜燕軍襲破營，禮被擒，霖遁去。不知所之。

劉伯完，不知邑里。洪武時，重天官之學，凡通曆象占步風角者，咸得衣食於官。有征討，必選擇從行。伯完精於占候，又諳回回曆法。起疇人，歷官欽天監副。靖難兵南下，在歷城侯軍中。從何福戰靈壁，敗績被獲，釋還。竟亡去，莫知所終。


贊曰：債軍之將亡國大夫，既無前祿，寧有後圖。遠逃者弋，偷全者軀龍不見尾，遐矣斯逋。

何應泰 趙清

何應泰，先世鳳翔人。父仕元，任四川廉訪使。過閩中，覩其俗質直，解官居焉。與編氓雜處，見父老行，輒執卑自下。閩人亦忘其為故吏，課教子弟毅甚。諸子恒凜凜惟謹。泰少時，父以手所閱經史授之。泰刻厲記誦久之，融貫。操紙為文，詞意邃茂。川中諸儒自以為不及。洪武初

詔選孝弟博聞之士，推入國學。為一時冠。九年，詔擇上舍生備燕府官屬，授泰奉祠。泰慨然曰：半爵一職，足以自獻。所患不忠勤耳。

王雅重之，嘗宣至帷幄，屏人咨議。泰具以質對，退為



忠恕銘以自盟。靖難後。藩邸諸臣各膺顯秩。泰獨稱疾不起。陳昌積曰。夫榮寵爵級。世之隴斷。所來性命以必趣者也。幸而蒙右眷。位膺貴。則坐高輿。披賜服。操呼吸風濤之勢。以恫喝薰赫人。使趨已不暇。視黼裳王綬。爲生賦世襲之具。晝村宵摩。以覓持保之術。苟可媾購。不辭臧獲。婦寺女態。而甘心之。甚則敘感訴昔。簌簌然出無情之涕。固要上意。有組肘之所不爲。而爲之矣。嗚呼。

朝廷之士。入而不能出。又何惑其然也。奉祠公躬被寵有年。國邸羣臣。鮮出其右。顧棄橐囊之富貴。而甘遯丘壑。舍魚水之君臣。而與牧叟爲伍。殊異乎世之嗜習矣。豈聞介子推之風。而興起邪。抑所托玄微。不可測度邪。楊子雲有言。君子德名爲幾。蜀巖湛冥。不作苟見。不治苟得。久幽而不改其操。雖隨和何以加諸。然實蜀之產也。古謂蜀多大隱之士。以奉祠公觀之。詎不然邪。公托素人主。又非若巖湛冥之平生於巖谷也。棄華而就高尚。尤不其難哉。

趙清鳳陽人。有膂力。善用兵。洪武中。積功官至北平都指揮使。陞後軍都督僉事。致仕。清去北平時。

皇明世宗 卷九十三
常懷隱憂不敢言。燕兵起，黃齊諸人薦清率河南兵守彰德。燕兵至城下，遣人招清。清對使人曰：「殿下至京城，但出片紙召清，清不敢不至。今為朝廷守封疆，不敢棄命失職。靖難後，召清還，清遂乞閒。」

贊曰：郎吏遭逢，修代來功。泰獨引疾，不與從龍。清也守義，應對從容。煌煌明哲，以保厥躬。

後死列傳

夫死有重於泰山，有輕於鴻毛。蓋言處死之不易也。當諸臣之戮力疆場，豈不一心所事，而一旦天命有歸，君亡事易，戮餘之人，何顏復立新朝。此時或釋甲自裁，或束身亡命，不亦名高千古，與鼎石克一諸忠爭烈哉。乃隱忍躊躇，不自引決，卒之斬祛之恥，難忘。彌釁之言不信，而叢疑積忌，死生慚恨，亦已晚矣。然究其所以終死之故，固建文之戮力臣也。作後死諸臣傳。

盛庸

平安

盛庸不知所自起以偏將從耿李北征屢有戰功李敗庸收軍濟南與缺鉉死守庸夜出劫戰晝憑城防禦盡毀北兵攻具捷聞封歷城侯克平燕將軍代李景隆總兵進駐德州燕師掠濟寧庸移營東昌

燕王頓兵城下庸背城而戰列火器以待燕兵鼓噪而前衝庸左翼不動盡爲火器所傷會平安兵亦合庸麾兵大戰斬燕大將張玉圍

燕王數重燕將朱能率胡騎奮擊東北角軍士趨之西南兵漸薄

燕王易服躍馬突出燕兵大敗走庸軍復大呼噪擒斬萬人翼日再戰燕又敗步卒先登庸乘之復擊殺無算北平震動出師以來未有也當燕兵敗北時

王獨以一騎殿後退駐館陶庸飛檄真定滄德諸將水陸犄角以邀歸路三年春燕兵復南出庸約吳傑平安共攻北平三月庸進營夾河安軍單家橋燕王掠庸陣不能動乃退庸出千騎追之

王率步兵攻左右翼而以精騎萬人直搗中堅庸麾軍力戰斬燕大將譚淵及指揮董真係等

皇明世法錄 卷之十二
王復以勁騎掩庸陣後。庸軍擁盾層疊自蔽。燕軍攻之不能入。

王以木鎖橫貫缺襜向前擲之。盾牽連不能蔽。燕乘隙急攻。庸士棄盾走。倉卒發火器。反燒自陣。軍遂却。莊得楚智張能皆死。是日戰酣。追暮。各斂兵入營。

王以十餘騎逼庸營野宿。明日引馬鳴角穿營而去。諸將士相顧不敢發一矢。以

詔無使

朕負殺叔父名故也。明日復戰。燕軍東北。庸軍西南。

自辰合戰至未。互勝負。將士皆疲。各坐息。少頃復起戰。忽東北風大起。塵埃障天。庸軍中昏暗不辨咫尺。燕兵乘風縱擊。庸軍大亂。燕兵追奔至滹沱河。庸走德州。是役也。庸恃東昌之捷。謂必破燕將士。咸攜金銀錦繡。曰破北平。張燕痛飲。至是盡爲燕所獲。四年五月。燕師長驅至淮上。庸南趨盱眙。領馬步列營淮之南岸。與燕兵相對。燕將丘福等率數百騎西行。以小舟潛濟。突庸陣。庸卒不能軍。遂單舸走。六月。燕兵次浦口。庸率舟師駐江上。嚴陣以待。燕師欲還。適高煦至。殊死戰。庸軍奔潰。都

皇明世宗金 卷九十二
督陳瑄以舟師降。北師渡江。庸率海艘出高資港。禦之。復敗走。靖難後。以璽書慰庸。安戢山東。永樂元年。致仕去。都御史陳瑛劾庸口出怨言。懷異圖。遂削庸爵。卒自殺。
平安。一名保兒。滁州人。累官都督僉事。李景隆北征。安爲叅將。二年四月。燕師渡白溝河。安伏精兵邀擊。

王曰。平安豎子。往從吾出塞。知吾用兵。是以敢前。及戰。互有勝負。因河清敗沒。乃還營。翼日再戰。安挺矛同瞿能父子奮擊。殺傷燕軍甚衆。黎明。能與燕

將房寬交戰。安帥大軍爲兩翼。

燕王見房陣披靡。張玉朱能陣動。呼曰。敵繞出我後矣。以七騎馳赴之。所乘馬三被創而三易。幾爲瞿能所獲。

王走隄上。佯麾鞭。若有後繼者。景隆疑有伏。不敢上。安斬燕將陳亨於陣。薄暮復戰。風折大將旗。能父子俱沒。安亦敗。奔北聲如雷。俞通淵滕聚皆死。景隆軍大潰。七月。安率衆次單家橋。高煦禦之。安疑不進。十二月。與盛庸合兵。敗燕兵於東昌。三年三月。復大戰於單家橋。擒燕將薛祿。祿脫走。閏三月。

皇明廿五法錄 卷九十三
戰於藁城敗績。九月燕攻定州。安率軍士直搗北平。

王命劉江還援。江及城。連放砲不絕。以疑安軍。遂大戰於城西。安敗績。十二月安率兵圍通州。大戰於九門。四年三月。燕師長驅過渦河。安將萬騎躡其後。燕設伏於淝河待之。令王真迎安軍。大戰斬真。四月安與何福進營於小河。斬燕將陳文。安操矛刺

王。垂及。而安馬忽蹶。燕將張武自林中躍出。得脫去。越數日。安帥馬步護糧於靈璧。燕兵來劫。衝擊安陣。分爲二。何福出城來援。與安合。殺傷甚衆。北兵引却。高煦率衆突至。福敗入城。明日。北兵破靈璧。安進戰。大敗。墮馬被執。送北平。靖難後。以爲北平行都督。

上問曰。向日非馬蹶當如何。安曰。刺陛下如拉朽耳。

上笑曰。高皇帝養下好漢。後有自北平入京者。

上問曰。平保兒無恙乎。安慚懼。飲鴆而死。

贊曰。庸固桓武。安亦驍雄。屢敗不休。血戰多功。埃

皇明世宗金 卷九十二
昏徵禍。馬蹶占凶。皇天不牖。上將星空。黃塵碎骨。慚彼英風。

吳傑 吳高 劉貞 楊文

吳傑。黔國威襄公復子也。洪武十八年。以指揮嗣封安陸侯。屢出山陝河南北平練兵。從征胡。二十七年。練兵浙江防倭。二十八年。有罪。令與吳高皆從楊文征龍州。立功自贖。建文中。與平安守真定藁城夾河之役。屢勝燕兵。傑結方陣於西南。王以精騎繞之。傑軍圍

王。矢集其旗如蝟。忽大風起。燕師乘之。傑遂敗。謫南

寧衛指揮使。尋死。永樂元年。子璟乞嗣。正統間。再三乞。皆不許。弘治六年。璟孫鐸援

詔乞嗣。亦不許。

吳高。江國襄烈公良子也。歷官前軍署都督僉事。洪武十七年。嗣江陰侯。屢出山陝北平河南練兵。從征胡。二十八年。有罪。調征趙宗壽。靖難兵起。高守遼東。與楊文數以兵攻永平。

王曰。高雖怯。行事差密。文勇而無謀。去高。文不足慮也。遣人遺二人書。盛譽高。極詆文。故易其函。投二人所。二人得書。並聞。



皇明世宗 卷之三
朝廷果疑高削爵徙廣西獨命文守遼東竟敗永樂
十二年編氓江陰已奪券洪熙元年謫戍海南死
徙其家會赦得釋宣德十年子昇乞嗣不許
劉貞合肥人開國功累陞左軍都督充大寧總兵
官修懷來城池靖難兵起貞及陳亨卜萬引大寧
軍出松亭關營沙河欲復遵化亨有二心燕師入
大寧盡驅其軍以行遂入松亭關貞夜負敕印浮
海歸時

朝廷聞行北平諸將降因籍貞家下獄俄貞由海道
出福建還京詔釋其家靖難後陞左都督鎮遼東

恒懷愧憤永樂元年卒貞長女
文皇昭順德妃也以故得免於禍

楊文含山人洪武中以從征功陞右軍都督僉事
世指揮使二十七年充總兵率舟師鎮守太倉仍
督浙江海船召掌中都畱守充總兵率十五萬人
征廣西築城設奉議南丹潯州慶遠四指揮司三
十年遼東練兵屯田充征虜前將軍率京師湖廣
江西兵征五開蠻賊建文初充總兵部署大寧兵
及寧府護軍屯開平靖難兵起宋忠敗文移守遼
左與吳高時出兵擾北平及高削爵徙廣西文專



領遼東。建文三年冬。文引兵萬餘掠薊州。殺戮極慘。遇劉江兵戰敗。指揮王雄七十一人。皆被執。靖難後。召文還。憐其開國老將。得不死。永樂四年卒。世羽林右衛指揮使。

贊曰。高傑。世將。貞文老革。夙負勇畧。時稱嘖喏。或以戍死。或以憂卒。先後同歸。云何不擇。

常昇 耿璿 耿璫 趙諒


常昇。開平王仲子。兄茂。封鄭國公。安置龍州。上念開平王功。封昇開國公。

懿文皇太子妃昇姊也。靖難兵至浦子口。昇及徐輝祖分道出戰。衆散。金川門失守。昇見

文皇得不死。謫雲南臨安。永樂二年。召至京。賞鈔幣。遣歸謫所。弘治五年

詔錄太廟。元祀功臣。孫復得為南京錦衣衛世指揮使。傳孫玄振。嘉靖十年。議封常李鄧湯四王後。十一年。續封玄振懷遠侯。

耿璿。長興侯長子。洪武中。為前軍都督僉事。尚懿文太子長女。江都郡主。建文元年。郡主進封公主。璿為駙馬都尉。掌前軍事。璿勇悍有膽畧。靖難兵起。以王室懿親。得預聞兵事。炳文北行。璿力勸直



搗北平。已而炳文戰數敗。璿怏怏抱病。時對公主
悲泣。

建文君遜去。杜門稱疾。竟坐罪死。公主復稱郡王。永
樂元年春憂卒。

耿獻長興侯仲子。累官至後軍都督僉事。燕兵起
與江陰侯吳高及楊文率遼東兵圍永平。不克退
係山海關。及高被間奪兵徙廣西。文守遼東。獻請
攻永平以動北平。文不聽。靖難後論死。

趙諒。開平王外孫。其母與
孝康皇后兄弟也。壯勇知兵。建文元年六月。以諒為

留守右衛指揮僉事。信任之。諒能效職。無私交。靖
難兵起。諒時奉密詔。往來督察諸將。壬午秋。常宗
人並得罪。諒亦坐廢。憂懼卒。

贊曰。昇璿貴戚。獻諒近暱。不決前死。徒抱後慄。令
名罔終。危疑自殛。覆巢完卵。噉泣何及。

徐安 嚴震直

徐安。鄞人。洪武中舉人才。累官濟南知府。調鳳陽。
燕兵南下。間道從靈璧出。鳳陽渡河。安謀知。折浮
橋。絕舟楫。以守。燕兵竟獲漁舟以濟。靖難後。罷歸
田。逾年。舉遺逸。有司上安名。得復任。居數載。鳳陽



諸戚里奏安凌宗親庇細民奪莊田。

上怒曰。朕昔尚爲安所困。况若曹乎。逮安謫戍雲南。嚴震直。烏程人。洪武五年起家布衣。授試叅議。尋授戶部郎中。陞工部右侍郎。逾年進尚書。二十六年鄉民訴其弟姪不法。

上付震直訊報。及具獄。

上以爲不欺。赦其弟姪。已坐事。降監察御史使龍州。二十八年修桂林靈渠。尋陞右都御史。復爲工部尚書。洪武三十年二月。震直上論兩廣鹽法。廣鹽得行。江西安贛吉臨諸府。震直質直勤敏。

上數稱之。靖難兵起。震直督餉齊魯間。兵敗。爲北兵所縛。致布囊兩馬夾鼻。至北平。永樂中復爲工部尚書。奉使安南。回至雲南。見文大師。悲愴吞金而死。震直魁梧。幼不喜讀書。惟力田供徭賦。長於算數。諸權貴皆喜之。

贊曰。徐拆浮橋。嚴吞金屑。各有忠志。罕稱完節。所欠一死。苟延歲月。見之不早。身輕名滅。

建文君哉。又云使練子寧在。吾固用之。豈有意殺建
 文諸臣哉。景隆喪師。而後南下。茹瑺納款。而後渡
 江。陳瑛修怨。逞毒。而後諸臣參夷。無噍類。賣國吳
 牙。陽賞其功。陰疑其心矣。卒之闔門禁錮者。景隆
 也。父子戮辱者。瑺也。舉宗屠滅者。瑛也。卽三人罪
 不可宥。獨不能以前勞贖乎。食報之酷。亦深恨其
 不忠。爲千古立炯戒耳。夫建文時臣。如黃福。鄭賜。

三不忠傳

李景隆

茹瑺

陳瑛

文皇云。吾欲效周公輔成王。天語如是。豈將不利於
 建文君哉。又云使練子寧在。吾固用之。豈有意殺建
 文諸臣哉。景隆喪師。而後南下。茹瑺納款。而後渡
 江。陳瑛修怨。逞毒。而後諸臣參夷。無噍類。賣國吳
 牙。陽賞其功。陰疑其心矣。卒之闔門禁錮者。景隆
 也。父子戮辱者。瑺也。舉宗屠滅者。瑛也。卽三人罪
 不可宥。獨不能以前勞贖乎。食報之酷。亦深恨其
 不忠。爲千古立炯戒耳。夫建文時臣。如黃福。鄭賜。

王鈍尹昌隆名列奸榜。後皆歸附。而獨三臣以不忠名。此

文皇微意也。作三不忠傳。

李景隆。盱眙人。襲父岐陽王文忠。封曹國公。

高皇帝曾賜手敕云。九江體爾嫡祖。忠孝不息。九江

其小字也。

建文君即位。周王府人告變。遣景隆即訊。景隆遂執

王楠至京師。廢為庶人。燕兵起。耿柄文敗績。黃子

澄薦景隆為大將軍。賜斧鉞。景隆驕倨自大。諸宿

將屬者咸不悅。師次河間。

燕王聞之曰。九江膏粱豎子耳。未嘗習兵。色厲中餒。

曷克任事。以數十萬眾付之。是自坑之也。趙括今

復見矣。及靖難師畧大寧。景隆乘間搗北平。築壘

九門攻之。都督翟能帥精騎攻彰義門。銳不可禦。

景隆故使人止之。俟大軍同進。能退。北平遂堅守。

時方盛寒。南兵植戟立雪中。凍死者甚眾。乃移營

白河。遣將陳暉逆戰。敗績。景隆盡棄其軍。單騎奔

德州。白溝河之戰。景隆大敗。奔濟南。及盛庸告捷。

召景隆還。諸臣請誅之。不聽。既而靖難師至江口。

景隆與茹瑺奉命至燕。軍議和。二人陰納欵。靖難



皇明世宗 卷之三
師逼金川門。景隆遂與谷王開門迎降。是年九月
進左柱國。丘福等每言此降虜何以位我輩上。已
而陳瑛劾景隆貪橫無狀。并劾其弟增枝鎮守荆
襄。公行不法。

文皇大怒。命褫其爵。沒其田產。闔門幽禁。絕喪葬嫁
娶者。五十餘年。初景隆盛時。有善相者云。腰脊厚
重。公輔之相。面如桃花。當貧困以死。至是果驗。嘉
靖中念岐陽功。續封七世孫性爲臨淮侯。至言恭
以督戎晉少保。敦說詩書。有儒將風。忠孝復振。
茹瑞。衡山人。洪武末。由監生官左通政。遷吏部尚

書。改兵部。建文初。以兵尚掌河南布政司事。靖難
師至江上。

建文君遣瑞詣軍中勞問。瑞私稱臣。獻密計。燕師遂
從金川門入。事既定。

詔稱王寧及瑞孝於

太祖。忠於國家。封寧順昌侯。瑞忠誠伯。寧蓋駙馬都
尉。向與徐增壽爲燕內間者也。瑞尋加太子少保。
永樂七年。除名回籍。家人興安告其隱事。復械至
京。久之得釋還家。道經長沙。坐不朝谷王。都御史
陳瑛劾之。復逮下錦衣獄。瑞懼。命其子銓市砒霜。

皇明世宗 卷九十二
藏飯中送食遂死。法司以聞。銓坐殺父律論死。婦人送浣衣局。幼男發鞍轡局。谷王亦於永樂十五年。陰養死士。降庶人。錮南京。闔室自焚。

陳瑛。河間獻縣人。建文初。爲北平按察使。受王府金錢通密謀。爲僉事湯宗所告。逮瑛。謫廣西。

文皇卽位。召爲都御史。

上欲爲

建文君輟朝五日。瑛請減之。又請追戮黃觀。廖昇。王叔英。周是修。王良顏。伯瑋等。

上曰。朕舉義師。所誅不過齊黃數輩耳。後來二十九人中。黃福。尹昌隆。張統。王鈍。鄭賜。皆宥而用之。況不與其數者乎。彼食其祿。自盡其心耳。方孝孺諸獄。宗戚受禍。慘毒皆瑛羅織。至胡閏一獄。抄提數百家。男女至東市。寃號之聲徹天。兩列御史皆掩泣。瑛亦色慘。謂人曰。不以叛逆處此輩。則我等歸附無名。於是諸忠臣幾無遺類。永樂七年。給事中耿通劾其朋比蒙蔽。誣構兵部主事李貞於死。八年中。允劉子春劾其方命刻薄。九年。下獄誅之。夷其家。


論曰。忠臣殉國。非求生也。而終不死。賊臣市國。欲

免死也。而終不生夫。

君猶天也。天道緝然而善謀。疎而不失。傅瑕服貳里。克見佞。謝晦狼籍。柳燦塞謗。自以為有佐命勳。永保富貴。而皆不得良死。皆天也。景隆等之凶終。辱同孛戮。懣埒夷宗。計其偷息賈榮。多不過八九年耳。寧知二百五十餘年後。

兩朝恩詔。褒及諸忠。而三臣朽骨遺臭。猶有操史筆而誅其罪哉。為人臣者。可以鑒矣。

贊曰。孰鑿凶門。而輕一跌。孰持使節。而鼓佞舌。孰張鉗罔。而族夷滅。賣國之魁。新朝之蠶。快哉好還。凜乎史鉞。



皇明世法錄

終

三不忠傳

